



## VEDTEKTER FOR KOMMUNALE BARNEHAGAR

*Vedtektene gjeld kommunale barnehagar i Haram kommune, og inneheld generelle føringar om drift og anna informasjon som gjeld forholdet mellom føresette og barnehagane. Vedtatt i Haram kommunestyre 12.12.2024 og er gjeldande frå 01.01.2025.*

### 1. Eigartilhøve

Haram kommune eig og driv barnehagane i samsvar med Lov om barnehager (heretter referert som Barnehagelova), forskrifter og retningslinjer fastsett av Kunnskapsdepartementet, samt kommunale vedtak og planar for den einaskilde barnehage.

### 2. Føremål og innhald

Barnehagane skal i samarbeid og forståing med heimen ivareta barna sine behov for omsorg og leik, og fremje læring og danning som grunnlag for allsidig utvikling. (Barnehagelova § 1 Formål).

Barnehagane skal byggje på grunnleggjande verdiar i kristen og humanistisk arv og tradisjon, og på verdigrunnlaget som er fastsett i Barnehagelova og FN sin barnekonvensjon. Barnehagane skal fremje demokrati, mangfald og gjensidig respekt, likestilling, berekraftig utvikling, livsmeistring og helse. (Rammeplan for barnehagens innhald og oppgåver kap. 1).

Barnehagetilbodet i kommunen skal ha likeverdig kvalitet, samtidig som det skal vere rom for lokale tilpassingar.

**Årsplan:** Det skal årleg utarbeidast ein skriftleg årsplan for kvar barnehage, der innhald og organisering av barnehageåret skal kome fram. Styrar har ansvar for at årsplanen vert utarbeidd.

### 3. Barn og foreldre sin medverknad

For å sikre samarbeidet med barna sin heim, skal kvar barnehage ha eit foreldreråd og eit Samarbeidsutval (SU). Barnehageeigar skal sørge for at viktige saker vert lagt fram for samarbeidsorgana. (Barnehagelova § 4 Foreldreråd og samarbeidsutval). Kvar barnehage utarbeider egne retningslinjer for arbeid i samarbeidsorgana.

Barn i barnehagane har rett til å gje uttrykk for sitt syn på den daglege verksemda i barnehagen, og i saker som gjeld dei sjølve. (Barnehagelova § 3 Barns rett til medvirkning og hensynet til barnets beste). Barnehagane sine årsplanar skal synleggjere korleis dette vert arbeidd med.

#### **4. Tilbod, opningstid og ferie**

Eit barnehageår er frå 1. august eitt år til og med 31. juli året etter.

Barnehagane tilbyr tre-, fire- og fem dagars plass (60 %, 80 % og 100 % plass). Barnehagen er open alle kvardagar, med unntak av:

- Fem planleggingsdagar fastsett i barnehageruta
- Inntil tre veker stengt i samband med ferie. Dei kommunale barnehagane held stengt jul og påske. Det vil gå fram av barnehageruta til den einskilde barnehage kva for veker dei eventuelt har sommarstengt.

Alle barn skal ta fire veker ferie i løpet av eit barnehageår, der minimum tre av vekene er samanhengande i sommarmånadene. I tillegg kjem planleggingsdagar, jul og påske. For barn som avsluttar barnehageopphaldet innan 31.juli, skal all ferie takast innan utgangen av juli. I samband med skulen sine feriar kan barnehagen kartlegge behovet for å kunne gjere lokale tilpassingar i opningstid.

I samråd med SU skal styrar utarbeide retningslinjer for ferieavvikling. Desse skal innehalde fristar for ferieinnmelding, korleis innmeldinga skal skje, kva for veker ein reknar som hovudperiode for sommarferieuttak og evt. feriestenging/sommarope.

Ordinær opningstid er minimum 9,5 timar per dag i tidsrommet mellom klokka 06:45-17:00. Tidspunkt for opning og stenging går fram av barnehagerute og barnehagen sine heimesider. Styrar fastset opningstid og eventuell endring i denne i samråd med samarbeidsutvalet.

#### **5. Rett til barnehageplass**

Rett til barnehageplass er regulert i Barnehagelova § 16. Barn som fyller eitt år seinast innan utgangen av august det året det vert søkt om barnehageplass, har etter søknad rett til å få plass i barnehage frå august. Barn som fyller eitt år i september, oktober eller november det året det vert søkt om barnehageplass, har etter søknad rett til å få plass i barnehage innan utgangen av den månaden barnet fyller eitt år.

For å ha rett til plass må ein søke plass innan fristen for hovudopptak, og barnet må vere busett i kommunen ved oppstart i barnehagen.

I hovudopptaket vert det tildelt plass frå den månaden retten trer inn, også i dei tilfelle familien ønsker seinare oppstart. Om ein takkar nei til tilbod, mistar ein retten til plass, men kan søke på ny og bli vurdert ved supplerande opptak. Ny rett til plass trer inn ved neste hovudopptak.

#### **6. Opptak**

Barnehageopptak er regulert i Barnehagelova §§16-18 og forskrift om sakshandsamingsregler ved opptak i barnehage. Alle godkjente barnehagar skal samarbeide om opptak av barn. Haram kommune som barnehagemyndigheit har ansvar for eit samordna opptak for kommunale og private barnehagar.

Det skal nyttast elektronisk søknadsskjema som ein finn på [www.haram.kommune.no](http://www.haram.kommune.no)

## Hovudopptak

Hovudopptaket har søknadsfrist 1. mars, og gjeld barn med rett til plass i tråd med punkt 5 med oppstart i perioden 01.08.- 30.11.

## Opptakskrets

Opptakskrets for dei kommunale barnehagane er heile Haram kommune, men i den grad det er mogleg, vert det tildelt barnehageplass i det opptaksområdet barnet er busett i.

Ved ledig kapasitet, kan barnehagen vurdere å ta inn barn frå andre kommunar for eitt år i gongen.

## Opptakskriterier

Kommunen har ansvar for at barn med rett til plass vert prioriterte ved opptak i barnehage. Barnehageplass vert tildelt etter følgjande prioritering:

- 1. Barn med prioritet etter Barnehagelova § 18:** Barn med nedsett funksjonsevne og barn med vedtak etter lov om barneverntenester §§ 4-12 og 4-4 annet og fjerde ledd. Dokumentasjon vert kravd.
- 2. Barn frå familie med stor belastning:** Dette kan vere som følgje av flukt frå krig, på grunn av alvorleg sjukdom eller ved nedsett funksjonsevne hos føresette eller søsken. Dokumentasjon vert kravd.
- 3. Søsken:** Barn med rett til barnehageplass som har søsken i den ønska barnehagen ved oppstart.
- 4. Overflytting:** Barn som søker overflytting til ein anna barnehage i kommunen.
- 5. Alder.** Ved elles like forhold vert dei eldste barna tildelt plass først.

Når ein familie søker plass for fleire barn ved same opptak vil kommunen tilstrebe å tilby plass til søsken i same barnehage.

## Supplerande opptak

Ved ledig kapasitet, kan det gjerast supplerande opptak med utgangspunkt i opptakskriteriene og barnehagane sine rammer og føresetnader på det aktuelle tidspunktet.

## Klagerett

Ved hovudopptak kan søker klage over avslag på søknad om barnehageplass. Søkar kan også klage dersom verken første eller andre ønske vert innfridd. Ved supplerande opptak gjeld klagerett for søkerar med lovfesta rett til prioritet etter Barnehagelova § 18.

Klaga må sendast skriftleg til Haram kommune innan tre veker.

## 7. Oppseiing av plass

Barn som vert tildelt ein barnehageplass, beheld plassen til og med 31.07. det året barnet startar på skule eller til plassen vert sagt opp.

### Ved oppseiing av plass gjeld følgjande:

- Oppseiingstid er minimum to månader frå oppseiingsdato. Dette gjeld òg om plassen ikkje er tatt i bruk og om ein endrar type plass.
- I oppseiingstida vert det kravd foreldrebetaling/kostpengar og plassen kan disponerast.
- Oppseiing skal registrerast elektronisk i Føresettportalen.
- For plassar som vert sagt opp med verknad frå og med 01.04 vert det kravd betaling ut barnehageåret til og med 31.07. Det kan gjerast unntak dersom plassen vert tatt imot av andre barn i oppseiingstida.

Kommunen kan seie opp ein barnehageplass ved manglande foreldrebetaling. Ved flytting til en annan kommune, beheld barnet plassen ut gjeldande barnehage år. Ved hovudopptak vert barnehageplassen automatisk sagt opp om ein takkar ja til overflytting til anna kommunal eller privat barnehage i Haram, men ein må gi beskjed til barnehagen.

## 8. Foreldrebetaling

Foreldrebetaling er regulert i Barnehagelova §20 og «Forskrift om foreldrebetaling i barnehagar». Staten sin maksimalpris for foreldrebetaling gjeld i kommunen sine barnehagar. Foreldrebetaling vert vedteke i kommunestyret kvart år og følgjer kalenderåret. Det vert kravd betaling for 11 månader i året, der juli er betalingsfri. Betalingsfrist er 20. kvar månad.

Søskenmoderasjon: Det blir det trekt frå 30 % av månadsprisen for barn nummer to. For det tredje barnet og eventuelt fleire barn, blir barnehageplassen gratis. Søskenmoderasjon vert også gitt der søsken går i ulike barnehagar.

Betaling for kost kjem i tillegg. Satsar for kost skal fastsetjast med utgangspunkt i sjølvkostprinsipp.

Kommunen følgjer nasjonale reduksjonsordningar, og det kan søkjast om reduksjon i foreldrebetaling. Sjå kommunen sine heimesider for meir informasjon.

Manglande foreldrebetaling gjev grunn for oppseiinga av plass. Kommunen sine interne rutinar for innkrevjing gjeld.

## 9. Internkontroll

Internkontroll er regulert i Barnehagelova § 9, og skal sikre at krav i barnehagelova med forskrifter følgast. Barnehagane sin internkontroll er ein del av Haram kommune sitt heilskaplege internkontrollsystem, og skal tilpassast barnehagen sin storleik, eigenart, aktivitet og risikotilhøve.

## **10. Arealutnytting**

Barnehagane følgjer Kunnskapsdepartementet sine rettleiande normer på minst 4 m<sup>2</sup> leike- og opphaldsareal per barn over tre år, og minst 5,3 m<sup>2</sup> for barn under tre år.

Uteområdet skal vere seks gongar leikearealet inne.

## **11. Personalet**

Barnehagane skal ha bemanning i tråd med Barnehagelova §§ 24-26 og forskrift om pedagogisk bemanning. Dette regulerer krav til styrar, pedagogisk bemanning og grunnbemanning. For å fylle kravet til grunnbemanning, skal barnehagen ha minst éin tilsett per tre barn når barna er under tre år og éin tilsett per seks barn når barna er over tre år. Barn skal reknast for å vere over tre år frå og med august det året dei fyller tre år.

Krav i tilsette i høve norskferdigheiter, klesplagg som heilt eller delvis dekker ansiktet, politiattest, teieplikt og opplysningsplikt er regulert i Barnehagelova §§ 27-30, §§ 44-46.

## **12. Forsikring**

Kommunen har teikna kollektiv ulykkesforsikring for barna i barnehagane. Forsikringa gjeld personskade på direkte veg til og frå barnehagen, innanfor barnehageområdet og på turar arrangert av barnehagen innanfor opphaldstid.

Forsikringa gjeld ikkje skade på egedelar som til dømes briller, klede og vogn.

## **13. Helsekontroll**

Før eit barn startar i barnehage, skal det leggjast fram ei erklæring om barnet si helse i tråd med Barnehagelova § 30. Dersom barnet har møtt til dei ordinære undersøkingane ved helsestasjon, kan slik erklæring gis av føresette på eige skjema. Dersom ikkje, må føresette legge fram helseattest frå lege.